

Testu coordinau Regulamentu “Museu Cìvicu Giovanni Marongiu”

Aprovau cun delibera C.C. N° 31 de su 29.09.2014

Titulu I

Art. 1

Denominatzioni e sedi

Ant istituii in Crabas cun delibera de su Consillu Comunali n° 28 de su 21.03.1980 unu Museu Archeològicu chi pigat su nòmni de “Museu Cìvicu Giovanni Marongiu”, innui ant arreguau, po su prus, benis stòricus archeològicus chi ndi arribant de su territòriu de Crabas.

Su Museu tenit sedi in Crabas in sa bia de Tharros.

Art. 2

Natura

Su museu archeològicu de Crabas est un'organismu fissu de su Comunu sena scopu de lucru.

Art. 3

Missioni e Punnas

Su Museu Archeològicu comunali est un'istitutu culturali, scientificu, educativu, a su servìtziu de sa comunidadi cun sa punna de allogai, valorizai e fai gosai s'utèntzia (citadinus, bisitadoris, turistas e studiosus), de is benis stòricu-archeològicus de su Comuni de Crabas. Cussu favoressit su deretu a sa cultura e a su stùdiu finas in collegamentu cun totu is àterus atoris istituzionalis de su Territòriu e in mesu a totu, cun is Universidadis.

Art. 4

Funtzionis e còmputis

Su Museu tenit custus còmputis e funtzionis:

- a) a allogai, catalogai, restaurai, studiai e cuncordai comentis si depit totu is benis chi ddui funt in s'espositzioni fissa, me in is mustras temporàneas e me in is depòsitus po ddas tutelai e valorizai, de acòrdiu cun su Ministeru po is Benis e is Atividadis Culturalis;
- b) a valutai e potentzai su patrimoniu chi giai ddui est po ndi assegurai unu gosu prus bellu e futu;
- c) a si movi in acòrdiu cun is àterus Museus, situs archeològicus e bibliotecas de su territòriu;
- d) a fai cresci su patrimoniu museali cosa sua;
- e) a s'incurai de fai totu is documentus chi pertocant is benis chi tenit;
- f) de circa scientifica in su setori, in mesu a totu po favoressi e publicai stùdius e circas;
- g) a agatai, coberai, tutelai e valorizai is testimonias e is documentus de balori locali;
- h) a contribui a sa tutela de s'interesa de is benis archeològicus stòricus artisticus mòbilis e immòbilis e paesagisticus de su territòriu, s'innalendi a is òrganus de cumpetèntzia ònnia ameletzu de degradu, sperditziu e arruina, chi ddui podit essi;
- i) a ndi pesai atzionis de promotzioni po ammanniai su nùmeru de bisitadoris e po spaniai sa connoscèntzia de is benis chi si tenint siat po su chi pertocat sa stòria e su connotu locali siat po sa realidadi de oindii;
- j) a s'incurai de cuncordai mustras scientificas e divulgativas periòdicas finas traballendi a manu de pari cun àterus entis, istitutus e assòtziu po contribui a spaniai sa connoscèntzia de sa stòria, de is usus e de is costumus de sa tziviltadi locali;
- k) a fruniri s'agiudu suu e s'assistèntzia tècnica e organizativa po fai iniziativas chi sa Regioni, sa Provìntzia, Comuni e àteras istituzionis culturalis promovint;

- l) a traballai a manu de pari cun is Istituzionis Scolàsticas po promovi iniziatives dedicadas a cussas;
- m) a ospitai, tutelai, fai gosai is benis de propiedadi de àterus, apustis fata conventzioni chi tocat a fai ònnia borta;
- n) a coberai sa nomencladura chi pertocat totu is partis de is ogetus, de is frunimentus e de is ainas chi si spriculant, cuncordai is datus arragortus, cumpilai e s'incurai de publicai is catàlogus e monografias de su patrimòniu e atividadi cosa sua;
- o) cuncordai cunvènnius, cunferènzias, cursus de aggiornamentu, seminàrius, camineras temàticas, fainas de laboratòriu de caràteri culturali, interrelatzioni de caràteri culturali e de agiudu a manu de pari in su setori de sa circa cun àterus museus, universidadi e àteras istituzionis culturalis italianas e stràngias.

Art. 5

Gosu

Su sètiu de is repertus archeològicus est ordinau segundu is principiis e is critèrius chi sa normativa natzionali e regionali in vigori in matèria stabilint e segundu is esigènzias logísticas chi acollit s'Amministratzioni comunali in riferimentu a is cunditziunis de eficàcia e de eficèntzia de sa resa prus bella de su servìtziu publicu po chi funt destinadas. S'Amministratzioni comunali s'incurat de assegurai a sa sedi museali su mellus chi podit in contu de adequatesa e de funtzionalidadi, tenendi contu de is carateristicas de su locali e de is punnas e de is servitzius de istitutu.

Titulu II

Finanziamentus, programmatzioni e gestioni

Art. 6

Finanziamentus

Po apoderai sa sedi, de pigai comentu a cobertura de is costus chi pertocat sa gestioni ordinària de sa struttura museali, de is spesas de sa manutentzioni ordinària e straordinaria de su immòbili destinau a Museu, de is impiantus e de is frunimentus, po cuncordai is traballus de circa e de stùdiu, po is mustras temàticas e manifestatzioni de ònnia arratza de arti e cultura de fai in su Museu, e finas a mannu a mannu de is spesas chi si creint de serbiri po acumpirri is punnas de custu regulamentu, arrispetendi is inditus chi is Òrganus de cumpetèntzia disponint, su Comunu si ndi at a incurai a s'annu, cun stantziamentus in su bilànciu ordinàriu de dinai aposta chi su tanti s'at a podi carculai cunforma a is abisòngius e segundu is contributus finanziàrius chi po cussu s'Istadu, sa Regioni e àterus Entis ant a podi cuncedi.

In mesu a totu, a is spesas po is fainas e funtzionamentu de su Museu s'at a parai faci:

- cun su contributu de is fundus comunalis chi s'at a podi cambiai ònnia borta cunforma a is abisòngius de su servìtziu, a is intradas bendendi is billetus, e de cussas chi ndi bessint de iniziatives culturalis e consideradas is disponibilidadi de Bilànciu.
- cun su contributu de sa Regioni;
- cun is donatzioni e cun is contributus de àterus Entis e de citadinus privaus, finas in forma de prestazioni de benis e servitzius.

Art. 7

Strutura organizzativa

Sa strutura organizzativa de su Museu e is cambiamentus suos si decidint cun delibera de sa Giunta Comunali.

Sa cuncordadura de sa strutura si spartzit segundu a is fainas chi si faint a manera cuncreta.

Is Ufizzius de su Servitziu de cumpetèntzia s'ant a cuncordai in modu de assegurai sa flessibilidadi de is struturas, cunforma a is progetus chi si depint fai e a sa tenta chi si depit oteni.

Art. 8

Organismus de governu

Funt Òrganus de indiritzu e de gestioni tècnica, onniunu po is cumpetènzias suas:

- su Consillu Comunali;
- sa Giunta Comunali;
- su Responsàbili de su servìtziu Cultura;
- su Diretori de su Museu;
- su/is Curadori/is;
- su/is Responsàbili/is didàticu/us;
- su personali tènicu.

Art. 9

Cumpetènzias de is òrganus istituzionalis de su Comunu

Su Consillu Comunali:

- deliberat is Regulamentus, is mudaduras suas e is inditus programmàticus generalis
- deliberat a pitzus de is coberamentus chi ddui podint essi.

Sa Giunta Comunali:

- càstiat chi si ponint in pràtica is deliberas de su Consillu Comunali;
- disciplinat is oràrius po aberri su servìtziu a su pùblicu;
- disciplinat is tarifas po gosai de is benis e de is servìtzios;
- s'incurat a poni a craru is programmas generalis chi su Consillu Comunali at inditau.

Su Responsàbili de s'Ufìtziu Cultura s'incurat de su traballu de gestioni finantziària de su servìtziu museali.

Art. 10

Cumpetènzias de su Diretori de su Museu

Su Diretori de su Museu tenit custas cumpetènzias:

- a) subintendit a su coordinamentu tènicu-scientificu de su Museu, apoderendi is raportus cun s'Enti meri;
- ponit in pràtica a livellu operativu cun su servìtziu apostu, is inditus de programma chi at aprovau su Consillu Comunali;
 - traballat e proponit, is schemas de programma de s'annu o prus de un'annu e s'incurat de ddus poni in pràtica;
 - donat, candu est, parris a pitzus de conventzionis cun assòtzios, Entis o privaus; fait totu cussas atzionis chi abisòngiant, chi cumbenint e chi funt oportunas po assegurai su funtzionamentu prus bellu de su Museu, cunforma a is inditus de s'Amministratzioni comunali e cunforma a is punnas de su Museu;
 - aparat, a s'acabbu de s'annu, una relata asuba de s'istadu de su Museu, de cantu pùblicu ddui est andau e de is fainas generalis;
 - s'incurat a manu de pari cun s'Amministratzioni comunali a definiri su Statutu de su Museu.

Art. 11

Su Curadori

Est còmputu de su curadori a pensai de:

- ✓ s'incurai de is colletzionis, de ddas allogai, catalogai, ammanniai, valorizai e aparai. S'incurat, prus de totu, de cumpilai unu registru de intrada de is benis e de aprontai schedas de inventàriu de is benis aparaus e in depòsitu;
- ✓ fai traballus de circa po connosci mellus is colletzionis;

- ✓ traballai a manu de pari po definiri is punnas de programmas.

Art. 12

Su Responsàbili po sa didàtica

Est còmpitu de su Responsàbili po sa didàtica:

- ✓ a s'incurai de aprontai e gestiri is servìtzios de comunicatzioni didàtica e a sa spainadura;
- ✓ a s'incurai de aprontai programmas de acumprimentu chi pertocant custu àmbitu e a s'incurai de ddu poni in pràtica;
- ✓ a pigai parti a definiri is programmas generalis e a acumpriri is punnas de su Museu.

Art. 13

Su personali

Su museu est fruniu de personali cunforma a sa mannesa, tipologia e funtzionis suas, e cunforma a s'abisòngiu de assegurai sa continuidadi de su servìtziu, segundu a cantu est postu a craru in su progetu de gestioni chi s'Amministratzioni comunali at aprovau.

Art. 14

Su patrimoniu

Su patrimoniu de su Museu est fatu de:

- materiali de aparai e in depòsitu;
- materiali arriciu cun donatzionis, còmporas e sighendi;
- arredamentu e tecnològias po aparai;
- archìviu potogràficu e, candu est, setzioni documentària po is studiosus;
- materiali bibliogràficu, de documentatzioni e scientificu nau a mannu a mannu;
- materiali archeològicu.

Art. 15

Sètiu finanziàriu

Su pianu finanziàriu ddu ponit a craru su progetu de gestioni chi s'Amministratzioni comunali at aprovau.

Art. 16

Depòsitus

Po totu su chi pertocat is depòsitus de materialis, contendi finas cussus de propiedadi de s'Istadu, su chi depòsitat at a sighiri a teni sa propiedadi de sa cosa depositada, ma non ndi dda at a podi torrai a pigai bàsciu passau su tempus cuncordau. Non si podint acetai depòsitus unu tempus prus pagu de tres annus.

Acuntessendi de ddu ai, in su Museu, depòsitu de materiali de propiedadi de s'Istadu, custu dd'at a arregulai una cunventzioni aposta de stipulai intra de su Ministeru de cumpetèntzia e su Comuni de Crabas.

Is òbrigus e is deretus de su Comuni avatu a is chi depòsitant funt postus in contu in su Còdixi tzivili a pitzus de is depòsitus voluntàrius.

S'àutu de depòsitu dd'at a arregulai una cunventzioni aposta chi at a firmari su s'indigu, su Responsàbili de su Servìtziu e su chi depòsitat e s'at a annotai in su Registru generali de is depòsitus.

Art. 17

Inalienabilidadi

Is benis archeològicus in depòsitu o allestimentu in su Museu non si podint alienai.

Art. 18

Inventàrius

Totu is ogetus, chi intrant in totu o po còmpora o a indonu o po cali si siat àtera arraxoni in su Museu, si depint registrai cun is datus de riconoscimentu prus de importu (matèria, mannesa, tècnica, sugetu, edadi e, candu fait, a chini dd'at fatu e/o su meri e su logu de anca ndi arribat, e chi ddui funt, totu is documentus gràficus e potogràficus futus) in su Registru de càrrigu. Aici etotu ddui at unu registru de scàrrigu apostu innui tocat a annotai totu is morighingius de is òperas etotu; s'at a allogai finas còpia de inventàriu de is benis cunforma a sa normativa in vigori, innui is benis portant sinnali a nùmeru chi ddus at a scerai e chi non s'at a podi mudai prus. Is inventàrius, chi si faint e s'allogant agiornaus sighendi sa norma de is leis regionalis e Natzionali, s'ant a mandai in còpia a s'Ufitziu Cultura de su Comuni chi ònnia borta tocat a ddi comunicai is mudaduras fatas. A cada unu ogetu tocat de sterri una scheda scientifica de catalogatzioni. Is normas arremonadas in susu balint non sceti po is ogetus ma finas po is frunimentus arricius in depòsitu, chi s'ant a registrai me in is inventàrius de is depòsitus e sinnalaus a numeratzioni sua.

Sa numeratzioni progressiva originària de inventàriu non si podit mudai.

Art. 19

Imprèstidus

S'Amministratzioni comunali, intèndiu su parri de su Responsàbili de su servìtziu, podit concedi unu tantu de tempus, cun is cunsensus chi ndi arribant de artu e sceti a Museus e Entis de nòmini nodiu e po manifestatzionis de caràteri scientificu, s'imprèstidu de benis in depòsitu o aparaus. Is ogetus, is operas e is frunimentus cuncèdius a imprèstidu ddus depit assegurai su Museu e/o s'Enti chi ddus bolit po su balori chi s'at a cuncordai cun sa Subrintendèntzia de cumpetèntzia. Sa speditzioni e/o s'imprèstidu s'at a podi fai sceti apustis de ai intregau sa politza sua a su Comuni de Crabas.

Is imprèstidus de materiali de propiedadi de s'Istadu, candu incapitant, ddus arrègulat sa normativa in vigori.

Is bessidas, po chistioni de restàuru de ogetus de propiedadi de s'Istadu chi disponit sa Subrintendèntzia de cumpetèntzia sighint sa disciplina de custu artìculu e de sa normativa in vigori.

Art. 20

Formas de gestioni

Is fainas po valorizai is benis culturalis pùblicas si podint gestiri in forma dereta o non dereta.

Art. 21

Autorizatzioni e riprodutzioni

S'Amministratzioni comunali podit lassai permissus po fotografai frunimentus e ogetus de su Museu.

Su Museu podit pediri duas còpias de ònnia riprodutzioni fata. Is carcus funt proibbius, sarvu primori e insaras ddu at a depi autorizai ònnia borta s'Amministratzioni comunali, apustis tenta autorizatzioni ministeriali cunforma a sa normativa in vigori.

Art. 22

Raportus cun su territòriu

Su Museu favoressit cun su pùbliku suu is àterus museus, arragortas musealis, situs archeològicus spainendi materiali promotzionali e informàtivu chi ddi ant donau cussus etotu.

Art. 23

Oràriu

Su Museu de sòlitu est abertu a su pùbliku me in is diis de fatu e me in is diis de festa.

Po intrai a su Museu tocat a pagai su billetu de intrada sarvu esentzioni apostu chi s'Amministratzioni comunali at a disponi. In ònnia modu est assegurada a indonu s'intrada a is portadoris de andicap. Is oràrius e is mudaduras cosa sua, su prètziu po intrai tocat de ddus fai sciri a su pùbliku in modu futu.

Art. 24
Disciplina

A intru de su Museu, is bisitadoris si depint portai beni cunforma a is arrègulas de s'educatzioni Tzivili. Est proibbiu a su pùblicu a tocai is cosas aparadas, fumai, portai fustis e paràculus, fai atzionis chi potzant noxi o poni in perigulu is cosas aparadas o strobba a is àterus bisitadoris.

Po totu su chi non si est postu in contu in custu regulamentu si fait a arriferimentu a sa L.R. 14/2006 e a àteras normas de su setori.

Còpia de custu regulamentu at a depi abarraì apicada in sa sedi de su museu.